

Evening Dogri (NSD) Bulletin 14-03-2024

आकाशवाणी

खास खबरां ..

- 1 केन्द्री गृह मंत्रालय नै नागरिकता संशोधन अधिनियम 2019 सीएए दी अधिसूचना जारी करी दित्ती ऐ।
- 2 प्रधानमंत्री नरेन्द्र मोदी होर कोई इक लक्ख करोड़ रपे दी लागत आलिणं 112 राष्ट्रीय जरनैली सड़क परियोजनाएं दी शुरूआत कराई।
- 3 मोदी होर “सशक्त नारी–विकसित भारत” कार्यक्रम च शिरकत कीती। आक्खेआ जे भारत दी नारी शक्ति 21मीं सदी दे भारत दी प्रौद्योगिकी क्रांति दी अगुवाह बनी सकदी ऐ।
- 4 भारतीय चुनां आयुक्त राजीव कुमार होरें अज्ज राज्यें ते केन्द्र शासत प्रदेशों च तैनात कीते जाने आले चुनां निगरानें कन्नै गल्लबात कीती।
- 5 राष्ट्रपति द्रौपदी मुर्मू मॉरीशस दे राष्ट्रीय दिवस समारोह च बतोर “मुख परौहने” शामिल होने लेइ मॉरीशस पुज्जी गेइयां न।
- 6 “ओपन हाइमर” गी 96में ऑसकर समारोह च सब्बने शा बड्डी विजेता फिल्म रेही।
- 7 सुप्रीम कोर्ट नै भारतीय स्टेट बैंक चुनां बांड दा डेटा, कल शामी तगर चुनां आयोग गी सौंपने दा निर्देश दित्ता ऐ।

<><><><><><>

CAA

केन्द्री गृह मंत्रालय नै अज्ज नागरिकता संशोधन अधिनियम 2019 दे तैहत नियमें गी हुनै कोला किश चिर पैहले अधिसूचित करी दित्ता ऐ। जेहदे नै मुख भरै च

खुशी दा महौल ऐ ते लोकें गाजे बाजे कन्नै जशन मनाना शुरू करी दित्ता ऐ। एहदे नै अफगानिस्तान, बंगलादेश ते पाकिस्तान थमां आए दे हिंदू, सिख, बौद्ध, जैन, पारसी ते ईसाई समुदाय दे प्रवासी भारत दी नागरिकता दे पात्र बनी जांगन। एहदे लेई गोआंठी मुखें च उत्पीड़न दे शकार लोक ऑनलाइन भारत दी नागरिकता लेई दरखास्त देई सकदे न। इस बारे तफसीली जानकारी अधिसूचना च दिक्खी जाई सकदी ऐ।

<><><><><><>

PM-Gurugram

प्रधानमंत्री नरेन्द्र मोदी होरें अज्ज दपैहरी गुरुग्राम हरियाणा च तकरीबन 1 लक्ख करोड़ रुपें दी 112 राष्ट्री जरनैली शिड़कें सरबंधी परियोजनाएं दा उद्घाटन कीता ते नीह पत्थर बी रक्खेआ। जेहड़ी परियोजनाएं दा उनें उद्घाटन कीता, उंदे च द्वारका एक्सप्रेस-वे दी हरियाणा सेक्शन, लखनऊ रिंग-रोड दे 3 पैकेज, आंध्रप्रदेश च एनएच-16 दी आनंदपुरम-पेंदुरथी-अनाकापल्ली सेक्शन ते हिमाचल प्रदेश च एनएच-21 दी कीरतपुर थमां नेरचौक सैक्शन आले प्रोजेक्ट शामिल न। एहदे इलावा मोदी होरें जेहड़ी बड्डी परियोजनाएं दा नीह पत्थर रक्खेआ, उंदे च आंध्रप्रदेश च बैंगलुरु-कड़प्पा-विजयवाड़ा एक्सप्रेस-वे, कर्नाटका च एनएच-748 ए दी बेलगाम-हुमगुंड-रायचुर सेक्शन दे 6 पैकेज, हरियाणा च शामली-अम्बाला जरनैली शिड़क दे त्रै पैकेज ते पंजाब च अमृतसर-बठिंडा कारिडोर दे 2 पैकेज बी शामिल न। इस मौके पर बोलदे होई श्री मोदी होरें आक्खेआ जे अज्ज जेहड़े प्रोजेक्टें दा अज्ज उद्घाटन कीता गेआ ऐ, उंदे च विकसित भारत लेई अगली पीढ़ी दा ढांचा उपलब्ध होग। उनें आक्खेआ जे 9 जहार करोड़ रुपें शा मते दी लागत कन्नै बनाया गेदा द्वारका एक्सप्रेस-वे, दिल्ली ते हरियाणा बशकार सफर दा अनुभव, सदा कोला बेहतर होई जाग। प्रधानमंत्री होरें आक्खेआ ऐ जे 21मीं सदी दा भारत, इक बड्डे नजरियै गी लेइयै अग्गे बधा करदा भारत ऐ। उनें आक्खेआ जे एह बड्डे लक्ष्यें आला भारत ऐ। केन्द्री मंत्री नितिन गडकरी ते हरियाणा दे मुखमंत्री मनोहर लाल होर बी उत्थें मजूद हे।



PM Namu Drone Didi

प्रधानमंत्री नरेन्द्र मोदी होरें आक्खेआ जे कोई बी मुख महिला शक्ति दी गरिमा गी बधाइयै ते उंदे आस्तै नमें मौके पैदा करियै गै अग्गे बधी सकदा ऐ। प्रधानमंत्री होरें नमीं दिल्ली च अज्ज सशक्त कार्यक्रम गी संबोधत करदे होई एह गल्ल आक्खी। कार्यक्रम दरान प्रधानमंत्री होरें इक जहार नमो ड्रोन दीदिएं गी ड्रोन सौंपे। मोदी होरें आक्खेआ जे पूरा मुख बक्ख-बक्ख क्षेत्रें च भारत दी नारी शक्ति दी उपलब्धिएं पर मान करा'रदा ऐ। उनें आक्खेआ जे सरकार दी बक्ख-बक्ख योजनाएं करी इक करोड़ थमां मती महिला लक्खपति दीदियां बनी चुकी दियां न। प्रधानमंत्री मोदी होरें आक्खेआ जे 2014 च सत्ता च औने मगरा केई योजना महिलाएं आस्तै आनियां गोइयां न ते उंदी कामयाबी कन्नै शुरूआत कीती गई ऐ। उनें विश्वास जाहर कीता जे मुख दी महिला शक्ति 21मीं सदी दे भारत दी प्रौद्योगिकी क्रांति दी अगुवाई करी सकदी ऐ। प्रधानमंत्री होरें आक्खेआ जे ओने आले ब'रे च ड्रोन प्रौद्योगिकी दा मुख च विस्तार होग। प्रधानमंत्री होरें आक्खेआ जे भारत च आप सहायता समूहें महिला सशक्तिकरण दे क्षेत्र नमां इतिहास बनाया ऐ। इस मौके पर मोदी होरें दीन दयाल अंत्योदय योजना राष्ट्रीय ग्रामीण आजीविका मिशन दे समर्थन कन्नै सफलता हासल करने आली लक्खपति दीदिएं गी सम्मानत कीता। उनें हर जिले च बैंकें आस्सेआ लाए गेदे बैंक सम्पर्क शिविरें राएं घट्ट ब्याज दरें पर आप सहायता समूहें गी लगभग 8 जहार करोड़ रुपे दे दोआर बी दित्ते।



PM-VBAAW

प्रधानमंत्री नरेन्द्र मोदी होरें नमीं दिल्ली च पुराना किला थाहर आयोजित विकसित भारत एम्बैसडर आर्टिस्ट वर्कशाप दी सराहना कीती ऐ जेहदे च 50 शा मते कलाकारें हिस्सा लैता। विकसित भारत एम्बैसडर आस्सेआ सोशल मीडिया

मंच “एक्स” पर कीती गेदी इक पोस्ट उप्पर प्रतिक्रिया दिंदे होई प्रधानमंत्री होरें आखेआ जे एह इक सराहनेजोग गैह ऐ। उनें आखेआ जे इन्नी बद्ध गिनतरी च कला-प्रेमिं गी इस कार्यक्रम च दिक्खियै उनेंगी बड़ी खुशी होई ऐ।

<><><><><><>

PM-Freight Corridor

प्रधानमंत्री नरेन्द्र मोदी होर कल अहमदाबाद थमां वीडियो कांफ्रेंसिंग राएं विशेष माल कॉरीडोर दे दऊं नमें हिस्सें गी राष्ट्र दे नमित करगंन। नमीं दिलली च कारवाई ते बपार विकास सरबंधी भारतीय निगम डीएफसीसीआईएल दे डरैक्टर शोभित भटनागर होरें इक प्रेस कांफ्रेंस च दस्सेआ जे मोदी होर न्यू खुर्जा थमां साहनेवाल बश्कार 401 किलोमीटर लम्मे पूर्वी विशेष माल गलेयारे दा उद्घाटन करगंन ते पच्छमी हिस्से लेइ माल गलियारे दे न्यू मकरपुरा थमां न्यूघोलवड आले हिस्से दा बी उद्घाटन करगंन उनें दस्सेआ जे पूर्वी विशेष माल गलियारा उत्तर प्रदेश, पंजाब ते हरियाणा दे 12एं जिले थमां होइयै लंगगोग। उनें जानकारी दितती जे 85 कोला 90 फीसद माल गड्डिडएं गी विशेष माल गलियारे च तब्दील कीता गेआ ऐ।

<><><><><><>

ECI

निर्वाचन आयोग नै ओंदे लोकसभा ते विधानसभा चुनाएं आस्तै राज्यें ते केन्द्र शासत प्रदेशें च तैनात कीते जाने आले पर्यवेक्षकें दी अज्ज नमीं दिल्ली च इक बैठक कीती। बैठक च भारतीय प्रशासनिक सेवा, भारतीय पुलस सेवा ते भारतीय राजस्व सेवा ते होरने केन्द्रीय सेवाएं आस्तै गेदे 2 ज्हार इक सौ 50 वरिष्ठ अधिकारिएं बैठक च हिस्सा लैता। किश अफसरें वर्चुअल माध्यम राएं बी बैठक च हिस्सा लैता। 900 आम निगरान, 450 पुलस निगरान ते 8 सौ खर्चे पर तक्क रखने सरबंधी निगरान तैनात कीते जा'रदे न। मुख् चुनां आयुक्त राजीव कुमार

होरें निगराने थमां निरपक्ख आजाद ते लालच मुक्त चुनां करोआने आस्तै सब्बने गी बरोबर मौका देने दा निर्देश दित्ता। कुमार होरें आक्खेआ जे पर्यवेक्षकें गी निर्वाचन आयोग दा प्रतिनिधि दस्सेआ ते मेद जाहर कीती जे ओह पेशेवर तरीके कन्नै कम्म करगंन ते मेदवारें सनें सब्बने सरबंधी धडें गी सेवा उपलब्ध करोआन। उनें निगरानें थमां मतदान केन्द्रें दा दौरा लाने ते संवेदनशील इलाकें दी स्थिति बारे च जानकारी देने लेई गलाया। कुमार होरें दस्सेआ जे निर्वाचन आयोग नै सारे सर्कुलर परतियै जारी कीते।

<><><><><><><><>

President Mauritius Visit

राष्ट्रपति द्रौपदी मुर्मू मॉरीशस दे राष्ट्रीय दिवस समारोह च मुख्ख परौहने दे तौर शामल होने आस्तै मॉरीशस पुज्जियां। राष्ट्रपति हुंदा राजधानी पोर्ट लुइस पुज्जने पर ओपचारिक सुआगत कीता गेआ। मॉरीशस दे प्रधानमंत्री प्रविंद कुमार जगन्नाथ होरें राष्ट्रपति मुर्मू हुंदा सुआगत कीता। साढे संवाददाता दी रिपोर्ट मूजब राष्ट्रपति होर मॉरीशस यात्रा दे पैहले दिन उत्थुआं दे राष्ट्रपति पृथ्वीराज सिंह रूपन हुंदे कन्नै दपक्खी बैठक लांगन। बैठक मगरा ओह आर्युवेद बाग दा दौरा करगंन। राष्ट्रपति होर मॉरीशस दे राष्ट्रपति होरें गी रपे कार्ड बी भेंट करगंन। राष्ट्रपति मुर्मू सर शिवसागर रामगुलाम वनस्पति उद्यान दा बी दौरा लांगन। एह बाग 33 हैक्टर च फैले दा ऐ। राष्ट्रपति होर मॉरीशस दे साबका प्रधानमंत्री सर सिवुसागर राम गुलाम ते सर अनिरुद्ध जगन्नाथ हुंदी समाधि पर श्रद्धांजलि भेंट करगंन। भारत ते मॉरीशस बश्कार मजबूत ते बडे पराने सरबंध न। 1948 थमां भारत ते मॉरीशस नै समुंद्री सुरक्षा ते छमता निर्माण च सैहयोग दे नमें आयाम कायम कीते न। दवै मुल्ख हिंद महासागर क्षेत्र च स्थिरता ते सुरक्षा आस्तै कम्म करा'रदे न। राष्ट्रपति द्रौपदी मुर्मू हुंदी यात्रा कन्नै दपक्खी सरबंधे च इक नमां ध्याह जोड़ग।

<><><><><><><><>

Meghwal-NIA

केन्द्रीय संस्कृति राज्य मंत्री अर्जन राम मेघवाल होरें भारत दे राष्ट्रीय अभिलेखागार दा डिजीटल प्रदर्शनी सुभाष अभिनंदन दा उद्घाटन कीता। नमीं दिल्ली च एह प्रदर्शनी नेता गी सुभाष चन्द्र बोस हुंदे जीवन पर लाई गई ऐ। इस मौके पर मेघवाल होरें आक्खेआ जे सरकार दे मिशन “विरासत भी, विकास भी” दा मकसद एह ऐ जे भारत दुनिया गी हर क्षेत्र च अगुवाई प्रदान करै। उनें गलाया जे अभिलेखें दा क्षेत्र इसदे च महत्वै आला योगदान देआ’रदा ऐ। भारत दे राष्ट्रीय अभिलेखागार दे जतनें दी सराहना करदे होई मेघवाल होरें मैहकमे गी लोड़चदी मदद करने दा भरोसा दोआया।

<><><><><><>

MIB Round Table

सूचना ते प्रसारण मंत्रालय नै नमीं दिल्ली च इक गोल मेज बैठक आयोजित कीती जिसदे च मीडिया ते मनोरंजन दे क्षेत्र च महिलाएं दी छवि गी पेश करने पर बचार बमर्श कीता गोआ। इस बैठक च समाचार, टेलीवीजन, रेडिया ते नेटमिल्क्स जनेह ओटीटी मंचें दे प्रतिनिधिएं, फिल्म उद्योग दी मन्नी परमन्नी दी हस्तिएं ते कनूनी माहिरें हिस्सा लैता। इस दरान चर्चा च गल्ल पर बचार बमर्श कीता गोआ जे मीडिया च किस चाल्ली कन्नै महिलाएं गी दस्सेआ जंदा ऐ। एहदे कन्नोकन्नी सामाजिक मुद्दें पर इसदे असर दा मूल्यांकन कीता गोआ। बैठक च हिस्सा लै’रदे लोकें जागरूकता दी कमी, फर्कोफर्की, छमता निमाण, नियमें गी बनाना ते खुल्ली चर्चा दी कमी जनेह मुद्दें गी बी पुट्टेआ। प्रतिभागिएं महिलाएं दी समावेशी ते बरोबर दे आधार पर हिस्सेदारी दी बी लोड़ दस्सी।

<><><><><><>

Coal Sector Employment

मुख्य दा कोयला क्षेत्र देशै दी ऊर्जा सरबन्धी जरूरतें गी पूरा करने च महत्वै आली भूमका नभा'रदा ऐ। कन्नै गै एह क्षेत्र बड़ी मती गिनतरी च रोजगार बी उपलब्ध करोआ'रदा ऐ। कोयला मंत्रालय नै दस्सेआ ऐ जे 6 मार्च 2024 तगर मुख्य दा कोयला उत्पादन बधियै 90 करोड़ टन पुज्जी गेआ ऐ। मंत्रालय नै आक्खेआ ऐ जे उत्पादन च एह बाद्धा ना छड़ा जरूरी ढांचागत विकास च योगदान करदा ऐ, सगुआं इसदे कन्नै खरी मती गिनतरी च रोजगार दे मौके पैदा होआ'रदे न। हाल दे ब'रे च कोयला इंडिया लिमिटेड ते इसदे उपक्रमें व्यापक भर्ती अभियान चलाया ऐ। इस अभियान च पिछले ब'रे च 59 जहार कर्मचारिएं दी भर्ती कीती गई। मंत्रालय नै एह बी दस्सेआ जे इससै चाल्ली इससै अवधि दरान एनएलसी इंडिया लिमिटेड नै 4 जहार थमां मते कर्मचारी भर्ती कीते।

<><><><><><>

Oscar Awards

रॉबर्ट ओपेन हाइम दी जीवनी पर मबनी फिल्म "ओपेन हाईमर" कैलिफोर्निया दे लॉस एंजिलिस च आयोजित 96में ऑसकर पुरस्कार च सब्बने शा बउडी जेतु फिल्म रेही ऐ। इस फिल्म नै बेह्तरीन फिल्म, ते बेह्तरीन अदाकार सनें कुल 7 पुरस्कार जित्ते न। किलियन मर्फी गी इस फिल्म लेई बेह्तरीन अदाकार दा पुरस्कार थोआ ऐ। परमाणु बम्ब दे जनक ओपेनहाइमर दी जीवनी पर इस फिल्म दा निर्माण क्रिसटोफर नोलान नै कीता ऐ ते इसी 13 बक्ख-श्रेणिएं लेई नामजद कीता गेआ। फिल्म लेई रॉबर्ट डानुनी जूनियर गी बेह्तरीन सहायक अदाकार ते क्रिसटोफर नोलान गी बेह्तरीन निर्देश दा पुरस्कार थोआ ऐ। एहदे इलावा इस फिल्म गी बेह्तरीन फिल्म एडिटिंग, बेह्तरीन सिनेमेटोग्राफी ते ओरिजनल स्कोर दा पुरस्कार बी हासल होआ ऐ। ऑसकर समारोह च एम्मा रूटोन गी फिल्म "पुअर चिंगस च अपने रोल लेई बेह्तरीन अदाकारा दा अकादमी पुरस्कार दित्ता गेआ ऐं इस फिल्म नै बेह्तरीन प्रोडक्शन डिजाइन, मेकअप ते कॉस्टियूम डिजाइन लेई बी पुरस्कार जित्तेआ ऐ। बेह्तरीन सहायक अदाकारा दा पुरस्कार फिल्म "द होल्ड ओवरज़" दी हिरोइन डा'वाइन जॉय रैनडोल्फ बारबी गी दित्ता

गेआ ऐ। बेह्तरीन दस्तावेजी फिल्म दा पुरस्कार यूक्रेन दी फिल्म ट्वेंटी डेज़ इन मरियोपोल गी थहोआ ऐ।

<><><><><><>

SC-Electoral Bond

सुप्रीम कोर्ट नै भारतीय स्टेट बैंक गी निर्देश दित्ता ऐ जे ओ चुनावी बांड दा बयोरु कल शामी तगर चुनाव आयोग गी सौंपी देयै। अदालतै इस सिलसिले च बैंक गी होर मता समा देने थमां इंकार करी दित्ता ऐ। प्रधान न्यायधीश डी. वाईचन्द्रचूड हुंदी अध्यक्षता आली पंज जजें दी खंड पीठ नै निर्वाचन आयोग गी बी बैंक दी तरफा दित्ती गेदी सारी जानकारी 15 मार्च शामी 5 बजे तगर सरकारी वेबसाइट पर सांझी करने दा निर्देश दित्ता ऐ। भारतीय स्टेट बैंक नै सुप्रीम कोर्ट अगगे गुजारश कीती ही जे इस सिलसिले च बयोरु देने लेई 30 जून तगर दा समां उसी दित्ता जा। सुप्रीम कोर्ट नै 15 फरवरी गी चुनावी बांड योजना पर रोक लाई दित्ती ही। निर्वाचन आयोग गी चंदे दा बयोरु 13 मार्च तगर सार्वजनिक करने दा निर्देश दित्ता हा।

<><><><><><>

Pak Cabinet

पाकिस्तान दे नमें चनोए दे प्रधानमंत्री शहबाज शरीफ होरें संघीय मंत्रिमंडल च शामिल करने लेई राष्ट्रपति आसिफ अली जरदारी हुंदे अगगे अज्ज 19 नाएं दी सफारश कीती ऐ। सफारश दी इस चिट्ठी च भेजे गेदे 19एं नाएं च 12 मिंबर राष्ट्रीय असेंबली दे ते त्रै केन्द्री मंत्री दे तौरा पर त्रै सिनेटरें दे नां बी शामिल न। एहदे शा पैहले कल प्रधानमंत्री शहबाज शरीफ होरें चिरें रातीं तगर अपने सैहयोगिण कन्नै इक लम्मी बैठक च सलाह सूत्र. कीता हा जेहड़ी चिरें रातीं तगर जारी रेही ही। पाकिस्तान दे राष्ट्री अखबार “द डॉन” दी रिपोर्ट मूजब एह जानकारी उपलब्ध होइ ऐ। इस म्हीने दी 4 तरीक गी पाकिस्तान मुस्लिम लीग

नवाज गुट दे प्रधान शहबाज शरीफ होरें गी पाकिस्तान दे 24में प्रधानमंत्री दे तौरा पर सगंध चुकाई गई ही।

